

**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINA KAKANJ  
Općinsko vijeće**

**Broj:** 01/1-15-Z/22  
**Kakanj,** 28.02.2022. godine

**Z A P I S N I K**  
**sa 15. redovne sjednice Općinskog vijeća održane 28.02.2022. godine (ponedjeljak)**  
**u sali Općinskog vijeća sa početkom u 9:00 sati**  
**(sažetak zapisnika)**

Nakon intoniranja himne Bosne i Hercegovine 15. sjednicu Općinskog vijeća otvorio je Slaven Katičić, predsjedavajući Općinskog vijeća i pozdravio prisutne.

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Edin Aliefendić, Safet Šahman, Mejrema Purišević, Namir Talić, Mediha Mamela, Omer Musić, Nerma Aliefendić, Elvir Delibašić, Izudin Hrusto, Aldin Šljivo, Džemal Bećirhodžić (**naknadno pristupio**) i Izudin Puščul (**naknadno pristupio**) (**SDA**)

Vinka Aletović, Ahmed Begić, Miroslav Spasojević i Eldin Mijoč (**SDP BiH**)

Mirsad Tursum, Zerina Kovač, Fakir Ajdinović i Sabit Čehajić (**naknadno pristupio**) (**S BiH**)

Dževdet Huskić, Behija Kulović i Branko Češljijć (**NS**)

Enver Merdić i Mugdin Gorak (**SBB BiH**)

Adnan Čobo i Armin Bašić (**DF**)

Slaven Katičić (**HDZ BiH**)

Mujo Fafulić - **nacionalnih manjina**

**Odsutni vijećnici:** Nedim Mušija (**SDA**)

Predsjedavajući je konstatovao da je na sjednici u momentu prijave prisutno 26 vijećnika i vijećnica, te da su se stekli svi potrebni uslovi za validan rad i odlučivanje Općinskog vijeća.

Pored vijećnika sjednici su prisustvovali:

**Mirnes Bajtarević**, općinski načelnik

**Ferdo Mijač**, sekretar Općinskog vijeća

**Džihad Berbić**, pomoćnik općinskog načelnika za finansije

**Mirza Fazlić**, pomoćnik općinskog načelnika za privredu, urbanizam i zaštitu okoline

**Nurudin Hrusto**, pomoćnik općinskog načelnika za civilnu zaštitu

**Bahrudin Arnaut**, pomoćnik općinskog načelnika za opću upravu radne i zajedničke poslove, lokalnu samoupravu i mjesne zajednice

**Alem Škulj**, ispred Službe za imovinskopravne, geodetske poslove i katastar nekretnina

**Zijad Neimarlija**, direktor Zavoda za planiranje i izgradnju općine Kakanj

### **Izviestioci, obrađivači, gosti:**

Senad Čišija, direktor JU i Sanda Hasagić-Terzić, predsjednica UO JU „Gradska biblioteka“ Kakanj, Helmina Murtić, direktorica JU i Mirsada Čaluk, predsjednica UO JU za predškolski odgoj i obrazovanje „Mladost“ Kakanj  
Mirza Mušija, direktor JU i Nihad Tukić, član UO JU „Kulturno-sportski centar“ Kakanj

### **Predstavnici medija:**

NTV IC Kakanj  
Radio Kakanj  
Kakanj Info

### **Napomene o radu Kolegija Općinskog vijeća:**

U pripremi 15. redovne sjednice Općinskoga vijeća, Kolegij Općinskog vijeća je 21.02.2022. godine, održao sjednicu na kojoj je razmatrao predstavke i ostale materijale koji su bili proslijeđeni na Kolegij i to:

- a) **Informacija Fondacije Atelje za društvene promjene ACT o štetnim utjecajima MHE**
- b) **Molba Fondacije Atelje za društvene promjene ACT za hitnu reakciju – slučaj MHE „Bilješevo“**
- c) **Zahtjev Udruženja AARHUS Centar u BiH za učešće u internoj/javnoj raspravi u vezi sa izgradnjom MHE „Bilješevo“**
- d) **Izjašnjenje MZ Bilješevo, Podgora i Modrinje u vezi sa internom raspravom o MHE „Bilješevo“**
- e) **Stav MZ Donji Kakanj u vezi sa internom raspravom o MHE „Bilješevo“**

Kolegij je navedene predstavke prima k znanju i iste na znanje i uvid proslijedio vijećnicima ukoliko bi se ili kad se prijedlog odluke o davanju suglasnosti za provođenje dodjele koncesije za izgradnju MHE „Bilješevo“ na rijeci Bosni, ponovo bude razmatrao na sjednici Vijeća, kako bi imali u vidu stav navedenih mjesnih zajednica i nevladinih organizacija.

### **Usvajanje zapisnika sa 14. redovne sjednice Općinskog vijeća:**

Nije bilo primjedbi na zapisnik sa 14. redovne sjednice Općinskog vijeća i isti je usvojen sa 20 glasova ZA, bez glasova PROTIV i 2 glasa UZDRŽAN.

### **Nije bilo komentara na dostavljene odgovore na vijećnička pitanja:**

**Dževdet Huskić:** je komentarisao odgovor na pitanje u vezi izdatih ili zakupljenih parking mjesta u gradu. Na isti je dobio odgovor da su samo dva takva parking mjesta koja su izdata u zakup, te se u odgovoru navodi da će se postavljeno pitanje smatrati prijavom po osnovu koje će općinska inspekcija izvršiti inspeksijski nadzor. U tom smislu je tražio da mu se dostave informacije o rezultatima tog nadzora.

### **Komentari na dostavljena mišljenja na vijećničke inicijative:**

**Dževdet Huskić:** je komentarisao odgovore na dvije inicijative i rekao da je na inicijativu u vezi javnog objavljivanja spiskova isplaćenih općinskih podsticaja, stipendija, subvencija i drugog, dobio odgovor da se objavljivanje tih podataka vrši u skladu sa važećim propisima i nalogom inspektora iz oblasti zaštite ličnih podataka. Na to je rekao da mu nije jasno kako se jedni spiskovi objavljuju, a drugi ne objavljuju, pa je tražio da mu se dostave podaci o inspektoru koji je izadao takav nalog, radi pojašnjenja u primjeni Zakona o zaštiti ličnih podataka. U vezi inicijative za pomoć stanarima najstarije zgrade u gradu u aktivnostima zamjene krova je rekao da mu je poznato da Općina sufinansira takve radove sa 30 % sredstava, pa je pojasnio da je inicijativa imala za cilj da se obezbijedi dodatna pomoć tim stanarima jer se radi o starijim osobama, penzionerima koji nemaju mogućnosti da te poslove obave vlastitim sredstvima. S toga je pozvao da se još jednom razmisli i pokuša iznaći modalitet da se istima pomogne.

### **Vijećnička pitanja:**

**Fakir Ajdinović:** je postavio vijećničko pitanje da li postoji mogućnost postavljanja kontejnera za odvoz smeća na prostoru gdje se trenutno odlaže smeće u vrećama od strane stanovnika MZ Dumanac, tačnije na desnoj strani lokalnog puta iz pravca Kakanja u blizini područne škole u Roščevini?

**Behija Kulović:** je postavila vijećničko pitanje zašto se neki zaključci usvojeni u ovom sazivu Općinskog vijeća ne implementiraju u odlukama? U tom kontekstu je navela primjer zaključka usvojenog na sjednici Općinskog vijeća od 31.03.2021. godine kojim je zadužena Komisija za dodjelu petnaestoaprilskih priznanja da pripremi prijedlog novih kriterija i modaliteta dodjele petnaestoaprilskih priznanja, te zaključka sa iste sjednice da se u 2022. budžetskoj godini dopuni Odluka o utvrđivanju kriterija raspodjele sredstava za sport, na način da se Odlukom odredi procenat budžetskih sredstava koji se opredjeljuje za rad omladinskih selekcija u klubovima i da se uvrsti novi kriterij koji predviđa izdvajanje za klubove koji imaju ženske selekcije. Uprkos tome, na prethodnoj sjednici Općinskog vijeća je usvojena Odluka o izmjeni Odluke o dodjeli petnaestoaprilskih priznanja bez implementacije navedenog zaključka, te je usvojena Odluka o izmjeni i dopuni Odluke o utvrđivanju kriterija raspodjele sredstava za sport kojom nije precizno utvrđen i naveden procenat budžetskih sredstava opredjeljenih za omladinske i ženske selekcije.

**Dževdet Huskić:** je postavio dva vijećnička pitanja. Prvo je postoji li evidencija javnih skloništa na prostoru općine Kakanj i ako postoji, u kakvom su stanju i koji je njihov procijenjeni kapacitet? Drugo pitanje je koliko novca je do sada utrošeno na ugradnju, održavanje svih podzemnih kontejnera i prilagođavanje i nabavku specijalnih vozila za pražnjenje te vrste kontejnera na prostoru općine Kakanj, te kakva je njihova budućnost, odnosno postoji li plan za početak razvrstavanja otpada i plan kad i kako će se organizovati taj način raspolaganja otpadom?

**Nerma Aliefendić:** je postavila vijećničko pitanje u kojoj fazi je rješavanje problema klizišta na lokalnom putu Alagići – Čizmići u MZ Zgošća?

**Vinka Aletović:** je postavila vijećničko pitanja kada će doći do proširenja mreže daljinskog grijanja u MZ Kakanj II, ako se zna da je projektna dokumentacija za proširenje mreže daljinskog grijanja je urađena 2009. godine, gdje su mještani participirali u izradi projekta, a radi se o tridesetak domaćinstava u ulici Patriotske lige i Stjepana Kovačevića?

**Safet Šahman:** je postavio dva vijećnička pitanja. Prvo je pitanje kada je raspisan prvi javni poziv za utrošak sredstava planiran Budžetom iz 2020. godine, a odnosi se na stavku utroška sredstava za zaštitu okoline u iznosu od 193.200,00 KM? Drugo pitanje je na koji način se vrši isplata naknada predsjednicima mjesnih zajednica, odnosno postoji li odluka Vijeća ili nadležne službe o načinu isplate i visini naknade za rad predsjednika savjeta mjesnih zajednica i da li ukidanje žiro računa savjeta mjesnih zajednica znači ukiidanje pravnog statusa istih?

Predsjedavajući je konstatovao da je vijećnik Sabit Čehajić postavio vijećničko pitanje bez korištenja govornice.

**Sabit Čehajić:** je postavio vijećničko pitanje zbog čega se ne primjenjuju zakonke odredbe i to član 14. Zakona o pravima demobilisanih boraca (prednost pri zapošljavanju) prilikom raspisivanja konkursa za prijem radnika u JU „Mladost“ Kakanj i JU Centar za socijalni rad Kakanj?

### **Vijećničke inicijative:**

**Dževdet Huskić:** je pokrenuo dvije vijećničke inicijative. Prva je da se vijećničke inicijative, svaka posebno u postovima objavljuju na zvaničnoj Facebook stranici Općine Kakanj uz obrazloženje i prikadnu sliku vijećnika koji je podnio inicijativu, a iz razloga što bi svaka vijećnička inicijativa bila izložena „sudu javnosti“, te bi možda to bio dobar način da se prepoznaju stvarne potrebe stanovništva općine. Druga inicijativa je da se hitno organizuje akcija prikupljanja i odvoza šljake koja je služila za posipanje puteva prema Ponijerima i drugim prigradskim pravcima i mjestima, a zbog činjenice da je šljaka otpad koji nastaje pri topljenju ruda, uz napomenu da je upotreba šljake u ovu svrhu opasna i ne bi trebala biti korištena jer direktno dovodi u opasnost ljude i prirodu.

**Fakir Ajdinović:** je pokrenuo dvije vijećničke inicijative. Prva je za postavljanje saobraćajnog ogledala na putnoj komunikaciji Kakanj-Bičer-Dumanac na izlazu nadvožnjaka auto-puta, odnosno raskrsnici puteva za MZ Bičer i MZ Dumanac, kako bi se saobraćaj na navedenom putnom pravcu mogao nesmetano odvijati. Druga se odnosi na postavljanje znakova obavještenja-putokaza za JU „Centar za socijalni rad“ Kakanj na raskrnicama sa kružnim tokom saobraćaja, obzirom da korisnike usluga i goste koji dolaze izvan općine navigacija upućuje na Zavod zdravstvenog osiguranja Kakanj – socijalno.

**Behija Kulović:** je pokrenula dvije vijećničke inicijative. Prva je za proglašenje zaštićenog područja prašume Trstionica-Bukovica, a imajući u vidu informacije iz Press službe ZDK da su u toku aktivnosti na proglašenju zaštite novih pet područja prirode, među kojima nije prašumsko područje Trstionice. Druga inicijativa se odnosi na čišćenje i pranje ulica 311. lahke brigade i Selima ef. Merdanovića, a iz razloga što je nakon topljenja snijega i porasta temperatura na asfaltu i trotoarima tih ulica ostala ogromna količina abrazivnog materijala, prije svega šljake, kamenčića i frakcije, što uzrokuje podizanje velike količine prašine pri prolasku vozila.

**Safet Šahman:** je pokrenuo vijećničku inicijativu da se u što kraćem roku izvrši čišćenje korita rijeke Ribnice na dionici puta Dom-Podborje, konkretno na području gdje je već čišćeno korito u 2021. godini, kako bi se spriječila blokada protoka vode koja bi izazvala štetu na saobraćajnici, ali i prekid saobraćaja.

**Sabit Čehajić:** je pokrenuo vijećničku inicijativu za rješavanje tehničkih mogućnosti priključka na gradski vodovod u dijelu MZ Plandište. Naime, oko 20 stambenih objekata za koje je uredno izdato rješenje za gradnju nema mogućnost priključka na gradski vodovod, a koji problem traje već 2 godine gdje vlasnici objekata nemaju mogućnost da žive u istim i pored svih izdatih saglasnosti za gradnju i uredno izmirenih troškova prema Općini Kakanj.

Predsjedavajući je konstatovao da su vijećnici Mejrema Purišević i Namir Talić podnijeli vijećničke inicijative bez korištenja govornice.

**Mejrema Purišević:** je pokrenula vijećničku inicijativu za nabavka opreme za video nadzor kao i postavljanje iste na lokacijama ulaz-izlaz izletišta Ponijeri (prema Zavidovićima, Kraljevoj Sutjesci i Kaknju) u cilju zaštite i očuvanja imovine od otuđivanja i nanošenja štete.

**Namir Talić:** je pokrenuo vijećničku inicijativu da se uradi ucjevljenje i uređenje potoka koji prolazi kroz Tršće i to od džamije do mosta ispod škole, postavljanjem cijevi ili betoniranjem korita, te da se postave usporivači brzine u naselju Ivnica, kao i da se ograniči brzina u saobraćaju s ciljem bezbjednosti mještana tog kraja, a posebno djece.

### **Utvrđivanje dnevnog reda:**

Predsjedavajući je za 15. redovnu sjednicu predložio dnevni red koji je usaglašen na sjednici Kolegija od 21.02.2022. godine, na što nije primjedbi pa je isti usvojen jednoglasno sa 27 glasa ZA.

### **Usvojeni dnevni red:**

1. Prijedlog programa utroška namjenskih sredstava za zaštitu okoline Općine Kakanj za 2022. godinu
2. Prijedlog programa utroška sredstava iz Budžeta Općine Kakanj za podsticaj razvoja poduzetništva i obrta za 2022. godinu
3. Prijedlog programa utroška sredstava iz Budžeta Općine Kakanj za podsticaje u poljoprivredi za 2022. godinu
4. Izvještaj o realizaciji Programa utroška sredstava od komunalne naknade za 2021. godinu
5. Prijedlog programa utroška sredstava od komunalne naknade za 2022. godinu
6. Izvještaj o realizaciji Programa utroška sredstava od koncesionih naknada za 2021. godinu
7. Prijedlog programa utroška sredstava od koncesija za 2022. godinu
8. Izvještaj o realizaciji Plana redovnog održavanja javnih i nerazvrstanih cesta na području općine Kakanj za 2021. godinu
9. Davanje saglasnosti na Plan redovnog održavanja javnih i nerazvrstanih cesta na području općine Kakanj za 2022. godinu

10. Izvještaj o realizaciji Programa utroška neraspoređenog dijela namjenskih sredstava od prihoda preduzeća ostvarenih radom termoelektrana za 2021. godinu, sredstava od prodaje poslovnih prostora i stanova
11. Prijedlog programa utroška neraspoređenog dijela namjenskih sredstava od prihoda preduzeća ostvarenih radom termoelektrana za 2022. godinu, sredstava od prodaje poslovnih prostora i stanova i sredstava od prodaje zemljišta
12. Izvještaj o realizaciji i utrošku sredstava ostvarenih po osnovu naknade za vatrogastvo u 2021. godini
13. Informacija o stanju zaštite od požara i vatrogastva na području Općine Kakanj u 2021. godini
14. Program rasporeda i utroška planiranih sredstava od naknade za vatrogastvo u 2022. godini
15. Prijedlog odluke o izmjeni i dopuni Odluke o utvrđivanju naknada članovima upravnih i nadzornih odbora javnih ustanova
16. Prijedlog rješenja o konačnom imenovanju UO JU „Gradska biblioteka“ Kakanj
17. Prijedlog rješenja o konačnom imenovanju NO JU „Gradska biblioteka“ Kakanj
18. Prijedlog rješenja o konačnom imenovanju UO JU „Kulturno-sportski centar“ Kakanj
19. Prijedlog rješenja o konačnom imenovanju NO JU „Kulturno-sportski centar“ Kakanj
20. Davanje saglasnosti na Program rada JU „Gradska biblioteka“ Kakanj za 2022. godinu sa Finansijskim planom za 2022. godinu
21. Davanje saglasnosti na Pravila o izmjenama i dopunama Pravila JU za predškolski odgoj i obrazovanje „Mladost“ Kakanj
22. Davanje saglasnosti na Izvještaj o poslovanju i radu sa Finansijskim izvještajem JU KSC Kakanj za 2021. godinu
23. Davanje saglasnosti na Program rada sa Finansijskim planom JU KSC Kakanj za 2022. godinu

## **1. Prijedlog programa utroška namjenskih sredstava za zaštitu okoline Općine Kakanj za 2022. godinu**

**Predlagač:** općinski načelnik

**Obrađivač:** Služba za privredu, urbanizam i zaštitu okoline

**Izjesticoci:** Mirza Fazlić, pomoćnik općinskog načelnika

U diskusiji su učestvovali: Ahmed Begić, Dževdet Huskić i Armin Bašić.

**Ahmed Begić:** je projekat zbrinjavanja azbestnog otpada ocijenio jako skupim i pitao da li postoji drugi jeftiniji modalitet da taj otpad riješi, pa je podsjetio da je isti dugi niz godina bio na krovovima objekata i nije predstavljao problem, a u ovom trenutku se moraju izdvojiti značajna sredstva za njegovo zatrpavanje.

**Dževdet Huskić:** se nije složio sa razmišljanjem vijećnika Begića jer smatra da je zbrinjavanje azbestnog otpada preozbiljna stvar i da se to mora uraditi po propisima bez obzira koliko košta. U vezi program je pitao da li je su planirana sredstva za zbrinjavanje azbestnog otpada planirana za konačno zbrinjavanje, odnosno je li to konačna suma, zatim je pitao da li se na Ponijerima planira nabavka novog ili korištenog ski-lifta, te je izrazio sumnju da sredstva opredjeljena za rekonstrukciju mreže Vodokoma neće biti dovoljna.

**Armin Bašić:** se osvrnuo na programom predviđeno izdvajanje sredstava u iznosu od oko 390 hiljada KM za rekonstrukciju mreže daljinskog grijanja i u tom kontekstu pitao kakve su planske projekcije Grijanja, odnosno koliko dužnih metara se planira proširiti mreža ili za koliko se objekata planira proširenje. Naglasio je da smatra da se planiranim sredstvima mogla isfinansirati nabavka 70-80 kotlova na pelet ili sufinansirati sa 50% sredstava nabavka 70 toplotnih pumpi.

**Mirza Fazlić (odgovor):** je kazao da je izdvajanje sredstva za zbrinjavanje azbestnog otpada skup postupak, ali da nema alternativu, jer bi u slučaju drugačijeg rješavanja tog problema neko mogao odgovarati, te je naglasio da se izdvojenim sredstvima konačno rješava problem sa tim otpadom. U vezi ski-lifta je rekao da je planirana nabavka nove opreme koja će zadovoljiti sve tehničke i sigurnosne aspekte, te će biti pod garancijom, dok je u vezi proširenja mreže daljinskog grijanja rekao da se

planiranim sredstvima namjerava proširiti glavni vod i izgraditi podstanice za oko 400 korisnika u naselju Povezice.

Nakon diskusije Vijeće je usvojilo Program utroška namjenskih sredstava za zaštitu okoline Općine Kakanj za 2022. godinu sa 18 glasova ZA, 7 glasova PROTIV i 4 glasa UZDRŽAN.

## **2. Prijedlog programa utroška sredstava iz Budžeta Općine Kakanj za podsticaj razvoja poduzetništva i obrta za 2022. godinu**

**Predlagač:** općinski načelnik

**Obrađivač:** Služba za privredu, urbanizam i zaštitu okoline

**Izviestio:** Mirza Fazlić, pomoćnik općinskog načelnika

U diskusiji je učestvovala Behija Kulović.

**Behija Kulović:** se osvrnula na projekat ekonomskog osnaživanja žena i ocijenila ga korisnim i značajnim, te istakla da u narednim godinama treba za isti izdvojiti više od trenutnih 15 hiljada KM. Sugerisala je da se osim dosadašnjih obuka treba obratiti pažnja i na potrebe tržišta rada i proširiti obuku žena na vezenje, pletenje, keranje, kuharstvi, poslastičarstvo i drugo, te po završenoj obuci obezbjediti praktičan, kako polaznicama obuke, tako i drugim ženama. Sve navedeno smatra nužnim ukoliko se žele postići dugoročni efekti predmetnog projekta.

**Mirza Fazlić (odgovor):** je diskusiju vijećnice Kulović ocijenio korisnom, te naglasio da se Služba prilikom izrade i planiranja predmetnog projekta rukovodi projektima UŽOK-a i TRST-a, ali da se u narednom periodu treba obratiti pažnja na iznesene sugestije u diskusiji.

Nakon diskusije Vijeće je usvojilo Program utroška sredstava iz Budžeta Općine Kakanj za podsticaj razvoja poduzetništva i obrta za 2022. godinu sa 27 glasova ZA, 1 glas PROTIV, bez glasova UZDRŽAN.

## **3. Prijedlog programa utroška sredstava iz Budžeta Općine Kakanj za podsticaje u poljoprivredi za 2022. godinu**

**Predlagač:** općinski načelnik

**Obrađivač:** Služba za privredu, urbanizam i zaštitu okoline

**Izviestio:** Mirza Fazlić, pomoćnik općinskog načelnika

U diskusiji je učestvovao Dževdet Huskić.

**Dževdet Huskić:** je pohvalio program i istakao da će isti podržati, s tim da je kao zamjerku iznio nedovoljan iznos sredstava za predmetni program. Smatra da ga u narednom periodu treba finansijski pojačati, posebno u segmentu biljne proizvodnje (plasteničke i stakleničke), zatim u dijelu registracije poljoprivredne djelatnosti kao osnovne, te u dijelu koji se odnosi na nabavku poljoprivredne mehanizacije i opreme, a sve uzimajući naročito u obzir aktuelna svjetska dešavanja.

Nakon diskusije Vijeće je jednoglasno sa 29 glasova ZA usvojilo Program utroška sredstava iz Budžeta Općine Kakanj za podsticaje u poljoprivredi za 2022. godinu.

Predsjedavajući je predložio da Vijeće vodi objedinjenu raspravu po tačkama 4 i 5. dnevnog reda, a da se glasanje obavi pojedinačno.

## **4. Izvještaj o realizaciji Programa utroška sredstava od komunalne naknade za 2021. godinu**

## **5. Prijedlog programa utroška sredstava od komunalne naknade za 2022. godinu**

**Predlagač:** općinski načelnik

**Obrađivač:** Zavod za planiranje i izgradnju općine Kakanj

**Izjestilac:** Zijad Neimarlija, direktor Zavoda

U diskusiji je učestvovao Dževdet Huskić.

**Dževdet Huskić:** je podsjetio da je u prethodnoj godini bila planirana izgradnja željeznog pješačkog most preko puta zgrade „Ušće“ i da projekat iz razumljivih razloga (poskupljenje građevinskog materijala) nije realizovan. Međutim, iznenađen je činjenicom da taj projekat nije uvršten u program za 2022. godinu. Apelovao je da se od projekta neodustaje jer je značajan za stanovnike grada koji žive na tom području i predložio da se u eventualnom rebalansu planira realizacija istog.

**Zijad Neimarlija (odgovor):** je naglasio da se od projekta izgradnje predmetnog mosta nije odustalo, ali da taj projekat zahtjeva veći angažman struke kako bi se izgradnjom mosta riješio problem i pješačkog i motornog saobraćaja u tom dijelu grada.

Nakon diskusije Vijeće je usvojilo Izvještaj o realizaciji Programa utroška sredstava od komunalne naknade za 2021. godinu sa 23 glasa ZA, 3 glasa PROTIV i 3 glasa UZDRŽAN, te Program utroška sredstava od komunalne naknade za 2022. godinu sa 22 glasa ZA, 4 glasa PROTIV i 2 glasa UZDRŽAN.

Predsjedavajući je predložio da Vijeće vodi objedinjenu raspravu po tačkama 6 i 7. dnevnog reda, a da se glasanje obavi pojedinačno.

## **6. Izvještaj o realizaciji Programa utroška sredstava od koncesionih naknada za 2021. godinu**

### **7. Prijedlog programa utroška sredstava od koncesija za 2022. godinu**

**Predlagač:** općinski načelnik

**Obrađivač:** Zavod za planiranje i izgradnju općine Kakanj

**Izjavitelj:** Zijad Neimarlija, direktor Zavoda

U diskusiji su učestvovali: Safet Šahman i Behija Kulović.

**Safet Šahman:** se osvrnuo na Izvještaj o realizaciji programa koncesija i podatak u istom da RMU „Kakanj“ nije u toku 2021. godine redovno izmirivao obaveze po osnovu koncesija. U tom kontekstu je pitao šta će se dešavati u 2022. godini, jer od realizacije tih sredstava ovisi realizacija planiranih projekata u programu.

**Behija Kulović:** je navela da je primjetno da u programima koji se realizuju preko Zavoda nema projekata koje je NS predlagala kroz vijećničke inicijative, a za koje je u odgovorima navođeno da se trebaju uvrstiti u neki od programa kako bi bili realizovani. Navela je primjer inicijative za izgradnju pješačke staze koja spaja naselja Vardu i Pope sa gradskom jezgrom, kao i inicijativu za izgradnju trotoara u naselju Polje u MZ Čatići.

**Zijad Neimarlija (odgovor):** je rekao da je uplata koncesionih obaveza od strane RMU „Kakanj“ zakonska obaveza i da lično smatra da će iste biti realizovane u tekućoj, kao i narednim godinama. Pojasnio je da su prihodi po osnovu koncesija planirani u skladu s planom Ministarstva privrede ZDK za tekuću godinu i da su veći u odnosu na prethodnu godinu za oko 160 hiljada KM. Rekao je da ima informacije iz Rudnika da oni u tekućoj godini planiraju izmiriti zaostale, te također uplatiti tekuće obaveze, pa ukoliko bude tako stvorit će se mogućnost za rebalans i uvrštavanje određenih projekata koji trenutno nisu planirani u programu. U vezi primjedbi vijećnice Kulović je rekao da Zavod ocjenjuje i procjenjuje sve inicijative koje mu budu proslijeđene, te je podsjetio da je općinski načelnik predlagač svih programa dok Zavod vrši realizaciju onoga što Vijeće usvoji. Naveo je da smatra da se pješačka staza prema gradu može uraditi iz sredstava redovnog održavanja ili sredstava rezerve i da će vjerovatno biti urađena tokom godine, a što se tiče trotoara u Čatićima je rekao da općina podržava taj projekat i da će u istom učestvovati, ali da realizacija istog treba da ide od nadležnih organa ZDK u čijoj je nadležnosti ta cesta, obzirom da se radi o regionalnoj cesti.

Nakon diskusije Vijeće je usvojilo Izvještaj o realizaciji Programa utroška sredstava od koncesionih naknada za 2021. godinu sa 19 glasova ZA, 7 glasova PROTIV i 3 glasa UZDRŽAN, te Program utroška sredstava od koncesija za 2022. godinu sa 21 glasom ZA, 4 glasa PROTIV i 3 glasa UZDRŽAN.

Predsjedavajući je predložio da Vijeće vodi objedinjenu raspravu po tačkama 8 i 9. dnevnog reda, a da se glasanje obavi pojedinačno.

#### **8. Izvještaj o realizaciji Plana redovnog održavanja javnih i nerazvrstanih cesta na području općine Kakanj za 2021. godinu**

#### **9. Davanje saglasnosti na Plan redovnog održavanja javnih i nerazvrstanih cesta na području općine Kakanj za 2022. godinu**

**Predlagač:** općinski načelnik

**Obradivač:** Zavod za planiranje i izgradnju općine Kakanj

**Izviestilac:** Zijad Neimarlija, direktor Zavoda

U diskusiji nije niko učetvovao pa je Vijeće usvojilo Izvještaj o realizaciji Plana redovnog održavanja javnih i nerazvrstanih cesta na području općine Kakanj za 2021. godinu sa 16 glasova ZA, 7 glasova PROTIV i 4 glasa UZDRŽAN, te je usvojen Zaključak o davanju saglasnosti na Plan redovnog održavanja javnih i nerazvrstanih cesta na području općine Kakanj za 2022. godinu sa 18 glasova ZA, 7 glasova PROTIV i 3 glasa UZDRŽAN.

Predsjedavajući je predložio da Vijeće vodi objedinjenu raspravu po tačkama 10 i 11. dnevnog reda, a da se glasanje obavi pojedinačno.

#### **10. Izvještaj o realizaciji Programa utroška neraspoređenog dijela namjenskih sredstava od prihoda preduzeća ostvarenih radom termoelektrana za 2021. godinu, sredstava od prodaje poslovnih prostora i stanova**

#### **11. Prijedlog programa utroška neraspoređenog dijela namjenskih sredstava od prihoda preduzeća ostvarenih radom termoelektrana za 2022. godinu, sredstava od prodaje poslovnih prostora i stanova i sredstava od prodaje zemljišta**

**Predlagač:** općinski načelnik

**Obradivač:** Zavod za planiranje i izgradnju općine Kakanj

**Izviestilac:** Zijad Neimarlija, direktor Zavoda

U diskusiji je učetvovao Dževdet Huskić.

**Dževdet Huskić:** se osvrnuo na podatak iz Izvještaja koji govori da je ostao veliki iznos nerealizovanih sredstava od oko milion KM. Kao razlozi za to između ostalog se navodi da MZ nije obezbjedila odobrenje za građenje. U tom kontekstu je rekao da smatra da bi usvajanje programa na Vijeću trebalo da automatski bude osnov da nadležna služba izda odobrenje za građenje. Još je naveo da se analizom materijala može uočiti da je najmanje projekata za MZ koje gravitiraju Termoelektrani, što smatra neprihvatljivim. Predložio je da se odredi procenat od sredstava po predmetnom programu koji je nužno implementirati u projekte u MZ koje su u neposrednom kontaktu sa Termoelektranom. Na kraju je tražio pojašnjenje za koji put se izdvajanja 50 hiljada KM u MZ Doboj.

**Zijad Neimarlija (odgovor):** je podsjetio da je Vijeće prije 4-5 godina usvojilo zaključak koji određuje da za bilo koji projekat, koji je u planu za realizaciju, mora postojati prateća dokumentacija. Tu činjenicu je ocijenio kao razumnu, jer smatra da predstavnici organa MZ trebaju obezbjediti potrebnu dokumentaciju, obzirom da isti organi i apliciraju sa projektima prema Općini. U vezi puta u MZ Doboj je rekao da će sredstva biti implementirana u put koji odredi Savjet MZ Doboj, s kojim će predstavnici Zavoda stupiti u kontakt po usvajanju programa.

Nakon diskusije Vijeće je usvojilo Izvještaj o realizaciji Programa utroška neraspoređenog dijela namjenskih sredstava od prihoda preduzeća ostvarenih radom termoelektrana za 2021. godinu, sredstava od prodaje poslovnih prostora i stanova sa 20 glasova ZA, 5 glasova PROTIV i 3 glasa UZDRŽAN, te Program utroška neraspoređenog dijela namjenskih sredstava od prihoda preduzeća ostvarenih radom termoelektrana za 2022. godinu, sredstava od prodaje poslovnih prostora i stanova i sredstava od prodaje zemljištasa 20 glasom ZA, 3 glasa PROTIV i 5 glasova UZDRŽAN.



Predsjedavajući je predložio da Vijeće vodi objedinjenu raspravu po tačkama 12 i 14. dnevnog reda, a da se glasanje obavi pojedinačno, kao i da se rasprava po tački 13. dnevnog reda obavi nakon toga.

## **12. Izvještaj o realizaciji i utrošku sredstava ostvarenih po osnovu naknade za vatrogastvo u 2021. godini**

### **14. Program rasporeda i utroška planiranih sredstava od naknade za vatrogastvo u 2022. godini**

**Predlagač:** općinski načelnik

**Obrađivač:** Služba civilne zaštite

**Izjavitelj:** Nurudin Hrusto, pomoćnik općinskog načelnika

U diskusiji nije niko učestvovao pa je Vijeće usvojilo Izvještaj o realizaciji i utrošku sredstava ostvarenih po osnovu naknade za vatrogastvo u 2021. godini sa 26 glasova ZA, bez glasova PROTIV i 1 glas UZDRŽAN, te Program rasporeda i utroška planiranih sredstava od naknade za vatrogastvo u 2022. godini jednoglasno sa 28 glasova ZA.

### **13. Informacija o stanju zaštite od požara i vatrogastva na području Općine Kakanj u 2021. godini**

**Predlagač:** općinski načelnik

**Obrađivač:** Služba civilne zaštite

**Izjavitelj:** Nurudin Hrusto, pomoćnik općinskog načelnika

U diskusiji je učestvovao Dževdet Huskić.

**Dževdet Huskić:** je podsjetio na veliki broj subjekata pravnih lica koji nemaju uređenu protivpožarnu zaštitu, niti imaju zaključene ugovore o tim poslovima, niti imaju vlastitu protivpožarnu jedinicu. Pozvao je da se intenziviraju aktivnosti u tom pogledu, te je pitao da li postoji mogućnost da se Općina aktivnije uključi u uređivanje stanja u stambenim objektima (zgradama) u gradu, po pitanju uspostave propisanog protivpožarnog sistema, prije svega u nabavci protivpožarnih aparata, crijeva i druge opreme.

**Nurudin Hrusto (odgovor):** je rekao da ne treba svemu davati socijalni segment, navodeći da nabavka protivpožarnih aparata i opreme ne iziskuje velike troškove za stanare zgrada, a uz to i Zakon propisuje obavezu stanara i upravitelja u tom pogledu. Rekao je da Općina može sufinansirati takve aktivnosti građana, ali mora postojati svijest o obavezama stanara i volja da se stvari oko toga urede.

Nakon diskusije Vijeće je jednoglasno sa 27 glasova ZA usvojilo Zaključak o primanju k znanju Informacije o stanju zaštite od požara i vatrogastva na području Općine Kakanj u 2021. godini.

### **15. Prijedlog odluke o izmjeni i dopuni Odluke o utvrđivanju naknada članovima upravnih i nadzornih odbora javnih ustanova**

**Obrađivač:** Stručna služba za poslove Općinskog vijeća

U diskusiji nije niko učestvovao i Vijeće je usvojilo Odluku o izmjeni i dopuni Odluke o utvrđivanju naknada članovima upravnih i nadzornih odbora javnih ustanova sa 19 glasova ZA, bez glasova PROTIV i 7 glasova UZDRŽAN.

Predsjedavajući je predložio da Vijeće vodi objedinjenu raspravu po tačkama 16, 17, 18. i 19. dnevnog reda, a da se glasanje obavi pojedinačno.

### **16. Prijedlog rješenja o konačnom imenovanju UO JU „Gradska biblioteka“ Kakanj**

### **17. Prijedlog rješenja o konačnom imenovanju NO JU „Gradska biblioteka“ Kakanj**

### **18. Prijedlog rješenja o konačnom imenovanju UO JU „Kulturno-sportski centar“ Kakanj**

### **19. Prijedlog rješenja o konačnom imenovanju NO JU „Kulturno-sportski centar“ Kakanj**

**Predlagač:** Komisija za izbor u regulirane organe

**Obrađivač:** Komisija za izbor u regulirane organe

**Izjavitelj:** Muamer Mandra, predsjednik Komisije – umjesto njega predsjednik Komisije za izbor imenovanje – Edin Aliefendić.

**Edin Aliefendić:** je napomenuo da je konkursnu proceduru za predmetna imenovanja provela Komisija za izbor u regulirane organe, ali da će on zbog nemogućnosti predsjednika Komisije da prisustvuje sjednici, pročitati prijedlog lica za imenovanje sa liste uspješnih kandidata. Tako je predložio da se imenuju sljedeća lica: UO JU „Gradska biblioteka“, Sanda Hasagić-Terzić – predsjednica, Marin Mijač i Erna Veispahić – članovi, NO JU „Gradska biblioteka“, Arnela Vehab – predsjednica, Azra Čišija i Sanida Huskić – članovi, UO JU „Kulturno-sportski centar“, Nihad Tukić – predsjednik, Din Čurić i Fadil Šlobić – članovi, te NO JU „Kulturno-sportski centar“, Mustafa Subašić – predsjednik, Azra Čišija i Belmin Čehajić.

U diskusiji je učestvovala Behija Kulović.

**Behija Kulović:** je sugerisala da se ubuduće prilikom imenovanja uz ime i prezime kandidata navede akademsko zvanje i akademski stepen obrazovanja svakog kandidata. Još je istakla da ima nedoumicu oko kriterija za bodovanje kandidata i kazala da joj nije jasno da li se boduje radno iskustvo u struci ili iskustvo u djelatnosti konkretne ustanove, te je iznijela zamjerku na činjenicu da intervju sa kandidatom nosi 10 bodova, što smatra da ostavlja prostor za favorizovanje pojedinih kandidata.

Nakon diskusije Vijeće je usvojilo Rješenje o konačnom imenovanju članova UO JU „Gradska biblioteka“ Kakanj u sastavu: Sanda Hasagić-Terzić – predsjednica, Marin Mijač i Erna Veispahić – članovi, sa 18 glasova ZA, 1 glas PROTIV i 9 glasova UZDRŽAN, zatim Rješenje o konačnom imenovanju članova NO JU „Gradska biblioteka“ Kakanj u sastavu: Arnela Vehab – predsjednica, Azra Čišija i Sanida Huskić – članovi, sa 17 glasova ZA, 1 glas PROTIV i 7 glasova UZDRŽAN, zatim Rješenje o konačnom imenovanju UO JU „Kulturno-sportski centar“ Kakanj u sastavu: Nihad Tukić – predsjednik, Din Čurić i Fadil Šlobić – članovi, sa 18 glasova ZA, 1 glas PROTIV i 9 glasova UZDRŽAN, te Rješenje o konačnom imenovanju NO JU „Kulturno-sportski centar“ Kakanj u sastavu: Mustafa Subašić – predsjednik, Azra Čišija i Belmin Čehajić – članovi, sa 18 glasova ZA, 1 glas PROTIV i 9 glasova UZDRŽAN.

## **20. Davanje saglasnosti na Program rada JU „Gradska biblioteka“ Kakanj za 2022. godinu sa Finansijskim planom za 2022. godinu**

**Predlagač:** UO JU „Gradska biblioteka“ Kakanj

**Obrađivač:** UO JU „Gradska biblioteka“ Kakanj

**Izjavitelj:** Senad Čišija, direktor JU i Sanda Hasagić-Terzić, predsjednica UO JU „Gradska biblioteka“ Kakanj

U diskusiji nije niko učestvovao pa je Vijeće usvojilo Zaključak o davanju saglasnosti na Program rada JU „Gradska biblioteka“ Kakanj za 2022. godinu sa Finansijskim planom za 2022. godinu, sa 17 glasova ZA, 1 glas PROTIV i 7 glasova UZDRŽAN.

## **21. Davanje saglasnosti na Pravila o izmjenama i dopunama Pravila JU za predškolski odgoj i obrazovanje „Mladost“ Kakanj**

**Predlagač:** UO JU za predškolski odgoj i obrazovanje „Mladost“ Kakanj

**Obrađivač:** UO JU za predškolski odgoj i obrazovanje „Mladost“ Kakanj

**Izjavitelj:** Helmina Murtić, direktorica JU i Mirsada Čaluk, predsjednica UO JU „Mladost“ Kakanj

U diskusiji je učestvovao Adnan Čobo.

**Adnan Čobo:** je pitao imali potrebe da se u Pravilima konkretizuje nivo stručne spreme, odnosno broj bodova koje kandidat za direktora JU treba da ima obzirom da je trenutno određeno da kandidat treba da ima VSS I stepena studija.

**Mirsada Čaluk (odgovor):** je pojasnila da su Pravila JU usklađena sa Zakonom o predškolskom odgoju i obrazovanju koji kao uslove za poziciju direktora propisuje da kandidat treba da ima završen I ciklus studija uz radno iskustvo od 5 godina na poslovima odgoja.

Nakon diskusije Vijeće je usvojilo Zaključak o davanju saglasnosti na Pravila o izmjenama i dopunama Pravila JU za predškolski odgoj i obrazovanje „Mladost“ Kakanj sa 16 glasova ZA, 1 glas PROTIV i 9 glasova UZDRŽAN.

## **22. Davanje saglasnosti na Izvještaj o poslovanju i radu sa Finansijskim izvještajem JU KSC Kakanj za 2021. godinu**

**Predlagač:** UO JU KSC Kakanj

**Obrađivač:** UO JU KSC Kakanj

**Izjestilac:** Mirza Mušija, direktor JU i Nihad Tukić, član UO JU „Kulturno-sportski centar“ Kakanj

U diskusiji nije niko učestvovao pa je Vijeće usvojilo Zaključak o davanju saglasnosti na Izvještaj o poslovanju i radu sa Finansijskim izvještajem JU KSC Kakanj za 2021. godinu, 21 glasom ZA, bez glasova PROTIV i 6 glasova UZDRŽAN.

## **23. Davanje saglasnosti na Program rada sa Finansijskim planom JU KSC Kakanj za 2022. godinu**

**Predlagač:** UO JU KSC Kakanj

**Obrađivač:** UO JU KSC Kakanj

**Izjestilac:** Mirza Mušija, direktor JU i Nihad Tukić, član UO JU „Kulturno-sportski centar“ Kakanj

U diskusiji je učestvovala Behija Kulović.

**Behija Kulović:** je kazala da je primjetno da je iz njene prošlogodišnje diskusije uzeto dosta stvari u obzir prilikom izrade Programa rada JU za tekuću godinu, što je ocijenila pohvalnim. U tom smislu je pomenula besplatnu školu skijanja, postavljanje ledenih ploha, te prilagođavanje termina održavanja manifestacije „Udahni Ponijere“ vremenskim uslovima. Uz to se osvrnula na pozorišnu djelatnost JU i ocijenila da je malo tih predstava predviđeno Programom rada, kazavši da smatra da bi više od jedne predstave trebalo da bude organizovano mjesečno. Pozvala je menadžment JU na uspostavu jače saradnje sa školama kroz organizaciju besplatnih predstava u odgovarajućim terminima, te je predložila da se razmišlja o izvođenju predstava u školama. U vezi gradske galerije je istakla da bi se trebalo poraditi na većem broju izložbi tokom godine i na kraju naglasila da su velika očekivanja građana od JU u pogledu organizovanja što bolje i kvalitetnije kulturne ponude.

Nakon diskusije Vijeće je usvojilo Zaključak o davanju saglasnosti na Program rada sa Finansijskim planom JU KSC Kakanj za 2022. godinu, sa 24 glasa ZA, 1 glas PROTIV, bez glasova UZDRŽAN.

Predsjedavajući se zahvalio prisutnim i zaključio rad 15. redovne sjednice Općinskog vijeća u 12:25 sati, uz čestitku za 1. mart – Dan nezavisnosti i 8. mart – Dan žena.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog Zapisnika.

**SEKRETAR  
OPĆINSKOG VIJEĆA**  
Ferdo Mijač

**PREDSJEDAVAJUĆI  
OPĆINSKOG VIJEĆA**  
Slaven Katičić